

## Cudd fy meiau rhag y werin

### Caneuon Ffydd: Rhif 704

---



---

Cudd fy meiau rhag y werin,  
 cudd hwy rhag cyfiawnder ne';  
 cofia'r gwaed un waith a gollwyd  
 ar y croesbren yn fy lle;  
 yn y dyfnder  
 bodda'r cyfan sy yno' i'n fai.

Rho gydwbybod wedi ei channu'n  
 beraidd yn y dwyfol waed,  
 cnawd a natur wedi darfod,  
 clwyfau wedi cael iachâd;  
 minnau'n aros  
 yn fy ninas fore a nawn.

Rho fy nwydau fel cantorion,  
 oll i chwarae'u bysedd cun  
 ar y delyn sydd yn seinio  
 enw Iesu mawr ei hun;  
 neb ond Iesu  
 fo'n ddifyrwch ddydd a nos.

Gwna ddistawrwydd ar ganiadau  
 cras, afrywiog, hen y byd;  
 diffodd dân cynddeiriog natur  
 sydd yn difa gras o hyd,  
 fel y gallwyf  
 glywed pur ganiadau'r nef.

WILLIAM WILLIAMS, 1717–91

### MYFYRDOD

'Neb ond Iesu' yw cri Williams Pantycelyn erbyn trydydd pennill yr emyn hwn, gan ei fod yn gweld na all neb arall fynd ati i guddio ei feiau rhag y rhai o'i gwmpas a rhag Duw ei hun hefyd, trwy ei waed ac yn nyfnder ei drugaredd, sydd yn ddigon dwfn i foddio popeth sydd ynddo'n fai. Ef sydd hefyd yn rhoi cydwbybod lân iddo, ac yn gwneud i ganiadau'r byd ddistewi.

Mewn oes bur wahanol i un Pantycelyn, pan gawn ni fel Cristnogion ein hannog i osod ein Gwardedwr ochr yn ochr ag arweinyddion crefyddol mawr eraill, y mae'n rhaid inni wrthod pob ymdrech i'w osod ef fel un ymhlith llawer, neu hyd yn oed fel y gorau yn y ras. Mae ein Harglwydd Iesu Grist mewn dosbarth yn gyfan gwbl ar ei ben ei hun. 'Ymhlith a fu, neu ynteu ddaw, 'does debyg iddo fe', meddai Pantycelyn wrth gyhoeddi 'Mi dafla 'maich oddi ar fy ngwar' (493). Gwelai Iesu, nid yn unig fel y gorau a welodd y byd erioed, ond y gorau a wêl y byd byth. Yma eto

dywed pa mor anhepgorol ydy Iesu Grist, nad oes ‘neb ond Iesu’, a hynny nid yn unig yng nghyd-destun iachawdwriaeth ond ein bywyd i gyd yn gyffredinol. Mae am i’w nwydau oll, y cyfan sydd ynddo a’i ddoniau i gyd, gael eu gosod fel bysedd ar y delyn sy’n seinio enw Iesu mawr. Ef fydd yn ddefnyddio iddo ddydd a nos.

Fe heriodd Iesu ei ddisgyblion fwy nag unwaith am eu perthynas ag ef ei hun. A gofiwch chi ei her i’r deuddeg ar ôl i eraill weld bod cost bod yn ddisgybl yn rhy uchel ei bris, a bod ei eiriau amdano’i hun mewn perthynas â bywyd tragwyddol ac atgyfodi ar y dydd olaf yn rhy galed i wrando arnynt: “‘A ydych chiwchau hefyd, efallai, am fy ngadael?’” (Ioan 6:67). Ac ar ôl iddo hefyd fod yn cyfeirio ato’i hun fel bara’r bywyd, yn ddigon i gyflenwi eu hanghenion dyfnaf i gyd, mae Pedr yn sylweddoli yn sydyn nad oedd neb i gystadlu ag ef ac mae’n siarad ar ran y disgyblion eraill i gyd pan mae’n mynegi eu hangen llwyr amdano: “‘Arglwydd, at bwy yr awn ni? Y mae geiriau bywyd tragwyddol gennyti?’” (Ioan 6:68). Ni allai neb arall wneud yr hyn y medrai Iesu ei wneud drostyn nhw; nid oedd ‘neb ond Iesu’.

Ai fel rhywun pwysig a pherthnasol, neu fel rhywun cwbl anhepgorol y gwelwn ni Iesu? Pe baem ni’n colli gafael arno, a fedrai rhywun neu rywbeth arall gymryd ei le? A oes yna rywun heblaw Iesu yn abl i lenwi’n bryd?

## **GWEDDI**

O Dad nefol llawn cariad, rho i mi wybod mor unigryw ydy dy Fab, ac mor anhepgorol ydyw ar gyfer fy mywyd. Pwy arall all roi geiriau’r bywyd tragwyddol inni? Neb ond Iesu. Amen.